



## KERATAN AKHBAR

SURAT KHABAR	:	SINAR HARIAN			
TARIKH	:	25/12/2018	MUKA SURAT	:	37
JABATAN	:	PERHILITAN			
KLASIFIKASI	:	<b>PERHATIAN</b>			

### **Buaya tembaga 200kg ditangkap**



Anggota Jabatan Perhilitan Melaka berjaya menangkap buaya tembaga seberat 200kg di Empangan Durian Tunggal.

ALOR GAJAH - Jabatan Perlindungan Hidupan Liar dan Taman Negara (Perhilitan) Melaka akhirnya berjaya menangkap seekor buaya yang sering muncul di Empangan Durian Tunggal sejak beberapa bulan lalu.

Pengarahnya, Noorzakiah-anum Mohd Noh berkata, buaya tembaga seberat 200 kilogram dan sepanjang 3.4 meter itu ditangkap selepas pihaknya membuat pemantauan di kawasan empangan berkenaan sejak 14 Disember lalu.

Katanya, operasi dilakukan sekitar jam 5 petang semalam selepas pihaknya dimaklumkan buaya berkenaan memasuki kawasan limpahan.

"Tangkapan dibuat dengan kerjasama Syarikat Air Melaka Berhad (SAMB) dan Badan Kawal Selia Air (BKSA) yang membuat kerja-kerja pengeringan kolam menggunakan pam.

"Turut memberi bantuan menangkap reptilia berkenaan ialah Angkatan Pertahanan Awam (APM) dan bomba," katanya kepada Sinar Harian.

Difahamkan, buaya berkenaan akan dilepaskan di kolam Paya Indah Wetlands di Selangor.

Sementara itu, kakitangan SAMB, Mohd. Sham Hussin, 34, berkata, beliau menghargai kecekapan Perhilitan dan beberapa agensi lain yang pantas mengambil tindakan bagi menyelesaikan masalah.

"Ia merupakan kali pertama saya berdepan dengan situasi dihantui kelibat buaya sejak bekerja dengan SAMB tujuh tahun lalu.

"Tapi ia tidak menjejaskan kerja saya malah menjadikan insiden ini sebagai satu pengalaman yang sukar dilupakan," katanya.